

Sumiiffinni aalajangiiffissatut siunnersuutip tunngavilersuutaani ilanngussamilu nalunaarsorsimasuni qalorsuarsorluni aalisarnerup inerteqqutaalernissaa pillugu periarfissamik – taassumalu aningaasatigut kingunissai pillugit misissuineramik - Naalakkersuisut Inatsisartunut agguasseqqullugit Inatsisartut aalajangiiffisassaattut siunnersuut

(Inatsisartunut ilaasortaq Nikolaj Jeremiassen, Siumut)

pillugu

Aalisarnermut, Piniarnermut Nunalerinermullu Ataatsimiititaliap

ISUMALIUTISSIISSUTAA

Siunnersuutip aappassaaneerneqarnerani saqqummiunneqartoq

Ataatsimiititaliaq suliarinninnermini kingullermik ukuninnga inuttaqarpoq:

Inatsisartunut ilaasortaq Nikolaj Jeremiassen, Siumut, siulittaasoq
Inatsisartunut ilaasortaq Ane Hansen, Inuit Ataqtigiit, siulittaasup tullia
Inatsisartunut ilaasortaq Michael Rosing, Demokraatit
Inatsisartunut ilaasortaq Jens Immanuelson, Siumut
Inatsisartunut ilaasortaq Siverth K. Heilmann, Atassut
Inatsisartunut ilaasortaq Aqqaluq B. Egede, Inuit Ataqtigiit
Inatsisartunut ilaasortaq Hans Enoksen, Partii Naleraq

UKA2015-imi ull. 21. oktober 2015-imi siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Siunnersuutip nassatarissavaa sumiiffinni aalajangiiffissatut siunnersuutip tunngavilersuutaani ilanngussamilu nalunaarsorsimasuni qalorsuarsorluni aalisarnerup inerteqqutaalernissaa pillugu periarfissamik – taassumalu aningaasatigut kingunissai pillugit misissuineramik - Naalakkersuisut peqquneqarnissaat. Siunnersuuteqarnikkut raajaqassutsip illersorneqarnissaa siunertarineqarpoq.

Siunnersuutip Inatsisartuni siullermeerneqarnera

Siunnersuut siullermeerneqarami Siumumit, Inuit Ataqatigiinnit Partii Naleqqamillu taparserneqarpoq, akerlianik Demokraatit Atassutillu Naalakkersuisut assigalugit siunnersuut itigartinneqassasoq inassutigaaat.

Ataatsimiititaliap siunnersuummik suliarinninnera

Ataatsimiititaliamit aallaavittut isigalugu pingaartinneqarpoq raajarniarnerup illersorneqarsinnaasumik aammalu isumalluutit siunissami piujuartinneqarnissaannut kinguaassiorsinnaanissaannullu naapertuuttumik annertussuseqartinnissaa.

Tassunga ilanngullugu ataatsimiititaliap maluginiarpaar raajaqassutsip piffissami sivisuumi pitsaanngitsumik ingerlanera biologi kingullermik siunnersuinerat naapertorlugu 2015-imi ingerlaqqissimanngitsoq, taamaattumillu qallorneqarsinnaasut ukiuni aggersuni amerlinissaat naatsorsuutigineqartoq.

Taamaalilluni oqaatigineqarpoq:

”mikisut perortussat (takussuuttut) aalisarneqarsinnaalersussat amerliartormata, ukiuni kingullerni qulini amerlanerpaaffigisimasamittungajak amerlassuseqarlutik”

”raajat mikisut (marlunnik ukiullit) ukiuni 20-ni kingullerni agguaqatigiissillugu amerlassuserisarsimasaminniit amerlanerummata”

Tamanna tunngavigalugu biologit siunnersuinerminni kaammattuutigaat 2016-imi raajartassat (TAC) 90.000 tonsit sippussanngikkaat. Tamannalu 2015-imi 60.000 tonsinut kaammattuutaasunut sanilliullugu malunnaatilimmik qaffariarneruvoq.

Sumiiffiup siunnersuutip tunngavilersuutaani ilanngussamilu taaneqartup raajaqassutsip nalinginnaasumik ineriartorneranit allaanerunissaa, tassungalu ilanngullugu allanik pissuteqartumik sumiiffiup piujuartitsinissaq eqqarsaatigalugu immikkut iliuseqarfigineqartariaqarnera ilimagissallugu tunngavissaqanngitsoq ataatsimiititaliaq isumaqarpoq.

Illuatungaatigulli ataatsimiititaliamit oqaatigineqassaaq raajarniarnerup aalisagaqassutsimut sunniutai, tassungalu ilanngullugu qalorsuit marluk atorneqartarnerisa immap naqqanut sunniutaat pillugit paasissutissat annertunerusut politikikkut ujartorneqarneqarmata.

Tassunga atatillugu ataatsimiititaliamit eqqaasitsissutigineqassaaq 2013-imi ukiakkut ataatsimiinnermi (UKA2013/124) Inatsisartut Naalakkersuisunut peqqussutigimmassuk:

”... Kalaallit Nunaanni aalisarnermi tamarmi piujuaannartitsineq pitsaanerpaaffimminiitittuarniarlugu imartani Kalaallit Nunaata aalisarnikkut oqartussaaffigisaani raajarniarnermik nalilersuinermik, tassunga ilanngullugu atortut assigiinngitsut angallatillu angissutsimikkut assigiinngitsut immap naqqanut aalisagaaqqanullu qanoq sunniuteqartarnerannik nalunaarsuinermik, aallartitsinissaannik Naalackersuisut peqquneqarnissaannik Inatsisartut aalajangiiffigisassaattut siunnersuut.”

Nalilersuinerup tigonera ataatsimiititaliamit eqqaamaneqanngilaq, taamaattumillu 2014-imi ukiakkut qinersinissamik nalunaaruteqartoqarneranut atatillugu unitsinneqarsimassasoq ilimagineqarpoq.

Ataatsimiititarli isumaqarpoq nalilersuinissaq suli pisariaqarlunilu soqutigineqartoq siunnersuutikkut matumuunakkut erseqqissarneqartoq, taamaattumillu misissuineq ingerlateqqeqqullugu naammasseqqullugulu Naalackersuisut ataatsimiititaliamit kaammattorneqarpoq.

Siunnersuutip aningaasaqarnikkut kingunerisassai

Siunnersuuteqartup naatsorsuutiga misissuineq ukiup affaanik sivisussuseqassasoq (250.000 kr. missaani akeqassalluni), tamannalu Naalackersuisunit akerlilerneqanngilaq. Allatut naliliinissamut ataatsimiititaliaq pissutissaqarsorinngilaq.

Allannguutissatut siunnersuut eqqarsaatigalugu aningaasaqarnikkut kingunerisassat ataatsimiititaliamit nalileruminaatsinneqarput, misissuinerup unitsiinneqarsimasup ingerlateqqinneqarnissaa allannguutissatut siunnersuutip nassatarissammagu, taamaattumilu paasissutissanik atoqqinneqarsinnaasunik ingerlateqqinneqarsinnaasunillu peqartoqarnissaa aamma naatsorsuutigineqartariaqarluni. Taamaattumik allannguutissatut siunnersuutip aningaasaqarnikkut kingunerisassai pillugit naliliinerminnik aappassaneerinninnissamut akissuteqaamminni saqqummiusseqqullugit Naalackersuisut ataatsimiititaliamit qinnuigineqarput.

Ataatsimiititaliap inassuteqaatai

Allannguutissatut siunnersuut matuma kinguliani **allassimasoq akuerineqassasoq** **ataatsimiititaliamit isumaqatigiittumik inassutigineqarpoq:**

Kalaallit Nunaanni aalisarnermi tamarmi piujuaannartitsineq pitsaanerpaaffimminiitittuarniarlugu imartani Kalaallit Nunaata aalisarnikkut oqartussaaffigisaani raajarniarnermik nalilersuinermik, tassunga ilanngullugu atortut assigiinngitsut angallatillu angissutsimikkut assigiinngitsut immap naqqanut aalisagaaqqanullu qanoq sunniuteqartarnerannik nalunaarsuinermik,

20. november

UKA2015/134

aallartitsinissaannik Naalakkersuisut peqquneqarnissaannik Inatsisartut
aalajangiiffigisassaattut siunnersuut.

Taama oqaaseqarluni isumaliutissiisummilu allassimasut paasinnilluni ataatsimiitaliap siunnersuut aappasaaniigassanngortippaa.

Nikolaj Jeremiassen
Siulittaasoq

Ane Hansen
Siulittaasup tullia

Michael Rosing

Jens Immanuelson

Siverth K. Heilmann

Aqqaluaq B. Egede

Hans Enoksen